

四庫全書

集部

欽定四庫全書

古今詩刪卷二十八

明 李攀龍 編

明七言律詩

春興

劉基

會稽南鎮夏王封蔽日騰空紫翠重陰洞煙霞輝草木
古祠風雨出蛟龍玄夷此日歸何處玉簡他年豈再逢
安得普天休戰伐不令竹箭困輸供

追和音上人劉基

絕頂浮雲鎖石關，曲途危磴阻躋攀。
他年甲楯孤臣泣，此日齋鐘老衲閒。
夜永星河低半樹，天清猿鶴響空山。
干戈未定歸何處，擬結茅廬積翠間。

雪竹圖

劉基

雪壓江邊修竹林，沅湘晚色起愁陰。
川光浩蕩空青闊，山氣玲瓏太白深。
未得稍雲邀鳳宿，可能映水學龍吟。
無人谷裏吹春律，直節虛中恐不禁。

二月二日登樓 劉基

薄寒疎雨集春愁，愁極難禁獨上樓。
何處山中堪採藥，幾時湖上好乘舟。
銜泥乳燕聊相傍，泛水浮萍可自由。
見說蘭亭依舊在，祇今王謝少風流。

答嚴上人 劉基

江水東流西日微，閒身不繫獨何依。
塵埃蕭颯雙蓬鬢，霜露淒涼一衲衣。
百粵雨餘山翠合，三韓雲淨海青飛。
滄溟自古通天漢，夢遶黃姑織女機。

遊仙

孫炎

留侯弟子有初平九歲從師住玉京
天與數書皆鳥跡家傳一劍是龍精
西池桃實無消息東海桑田有變更
我為紫芝歌此曲夜深相答洞簫聲

閒適

王蒙

綠楊堪繫五湖舟袖拂東風上小樓
晴樹遠浮青嶂出春江曉帶白雲流
古今我愛陶元亮鄉里人稱馬少遊
不負平生一杯酒相逢花下醉時休

送沈左司從汪參政分省陝西汪由御史中丞

出 高啓

重臣分省出臺端
賓從威儀盡漢官
四塞山河歸版籍
百年父老見衣冠
函關月落聽鷄度
華岳雲開立馬看
知爾西行定回首
如今江左是長安

梅花 高啓

瓊姿只合在瑤臺
誰向江南處處栽
雪滿山中高士卧
月明林下美人來
寒依疎影蕭蕭竹
春掩殘香漠漠苔

自去何郎無好詠東風愁寂幾回開

九日寄朱見中

劉彥昂

野樹荒臺帶晚陰昔年歌舞憶登臨
桃花紈扇西風冷蔓草銅駝白露深
舊夢青雲連館閣多情華髮老山林
江南庾信傷秋倦疎雨簾櫳怯暮砧

海屋為龔古鼎賦

董良史

海上高僧屋數椽珊瑚碧樹繞階前
過橋雲磬天台寺泊岸風帆日本船
龍女獻珠來供佛鮫人分席與參禪

百年劫數如彈指眼見桑田幾變遷

舟次匡廬寄同朝諸公

任亨泰

翰墨同時侍禁闈恩榮寧謂及寒微舍人舊掌絲綸誥
御史新裁錦繡衣天上鴛鴦還接武江邊鷗鷺已忘機
他年行部如相覓秋水蘆花是釣磯

贈道會涂志清領職歸宜黃

朱彥昌

羽衣來自五雲端勅賜黃麻墨未乾梅福南昌成吏隱
葛洪勾漏本仙官一聲白鶴橫江夜三尺青蛇出袖寒

歸到鳳山春滿屋絳桃花發繞江干

白鴈

顧文昱

萬里西風吹羽儀獨傳霜翰向南飛蘆花映月迷清影
江水涵秋點素輝錦瑟夜調冰作柱玉闌晨度雪沾衣
天涯兄弟離羣久皓首江湖猶未歸

春遊東苑應制

林鴻

長樂鐘鳴玉殿開千官步輦出蓬萊已教旭日催龍馭
更借春流泛酒杯堤柳欲眠鶯喚起宮花乍落鳥銜來

宸遊好把簫韶奏京國於今有鳳臺

宿雨 郭奎

宿雨蕭蕭悴客心高齋連日滯秋陰一枝未遂鷦鷯志
四壁空愁蟋蟀吟家在淮南青桂老門臨湖水白蘋深
鯉魚風熟香粳早釣艇誰移近竹林

白燕 袁凱

故國飄零事已非舊時王謝見應稀月明湘水初無影
雪滿梁園尚未歸柳絮池塘香入夢梨花庭院冷侵衣

趙家姊妹多相忌莫向昭陽殿裏飛

追和岑補闕早朝之作

高棟

明光漏盡曉寒催長樂疎鐘度鳳臺月隱禁城雙闕迥
雲迎仙仗九重開旌旗半捲天河落閭闔平分曙色來
朝罷珮聲花外轉回看佳氣滿蓬萊

金山寺

趙宗文

水天樓閣影重重化國何年此寄踪淮海西來三百里
大江中湧一孤峯濤聲夜恐巢枝鳥雲氣朝隨出洞龍

幾度欲登帆去疾蒼茫遙聽隔煙鐘

擬長安春望

謝復古

南山晴望鬱嵯峨上路春香玉輦過天抱帝城雙闕迤
日臨仙仗五雲多驚聲盡入新豐樹柳色遙分太液波
漢主離宮三十六樓臺處處起笙歌

秋日江館寫懷

徐璣

水國天寒樹影稀西風又見鴈南飛郢中白雪無人
和江上青山有夢歸獨對浮雲傷往事驚看秋草又斜暉

十年浪迹煙波外滿眼塵氛未拂衣

寄虎丘蟾書記

姚廣孝

聞道蟾公如遠公一餅一鉢寄山中雲封蘿屋長疑雨
泉響松巖半是風履破只緣行脚久囊空非為作詩窮
遙思短簿祠前夜共聽寒鐘出澗東

送劉繡衣按交趾

解縉

虬髯白鳥繡衣郎驄馬南巡古越棠城郭新開秦郡縣
山河元是漢金湯天連銅柱蠻煙黑地接珠崖海氣黃

莫說炎荒冰雪少須令六月見飛霜

從遊西苑

楊士奇

廣寒宮殿屬天家曉從宸遊駐翠華瓊液總頒仙掌露
金支皆挿御筵花棹穿萍藻波間雪旗颭芙蓉水上霞
身世直超人境外玉盤親捧棗如瓜

客夜

鄭起

西風蕭蕭木葉稀秋深作客何時歸城頭月出照擊柝
江上露白催搗衣鴻鴈附書遠莫致烏鵲遠樹驚還飛

三更不眠欲起舞躍馬卧龍誰是非

車駕渡江

曾榮

朱旗畫戟擁堤沙錦纜牙樯照浪花佳氣迥連江北樹
曉光初絢海東霞雲中鸞鳳扶丹輦水底魚龍識翠華
不用臨流羨天塹只今四海盡為家

居庸

王英

千峯高處起層城空裏岩巖積翠明雲靜芙蓉開霽色
天清鼓角散秋聲北連紫塞烽煙斷南接金臺驛路平

此地由來稱設險萬年形勢壯神京

送陳郎中子魯再使西域

王直

翩翩旌旆出皇州瀚海崑崙是昔遊
塞外風雲隨使節天涯霜雪敝征裘
還家不論千金橐佩印須為萬戶侯
想見蕃夷歸聖德自西河水亦東流

沅州雜詩

薛瑄

辰沅風壤帶三苗一望中原萬里遙
翼軫衆星朝北極岷嶓諸嶺導南條
天連巫峽常多雨江過潯陽始上潮

近日詩懷殊浩蕩，謾將新句答漁樵。

題童居士雲深處

李孟璿

卷舒隨處本無心，道者幽居秋自深。
一片翠微迷曉色，半巖蒼霧鎖秋陰。
擁關不禁鐘聲出，護榻休嫌雨氣侵。
欲掃氤氲陪杖履，重來只恐路難尋。

賜午門觀燈

陳九宗

鰲峰千仞鬱嵯峨，春色遙涵太液波。
明月只隨仙仗轉，綵雲偏近御筵多。
星橋影動黃金闕，火樹光翻白雪歌。

共樂年華拚盡醉承恩不問夜如何

周駙馬府賞海棠

程敏政

冥冥花霧擁迴廊冉冉猩紅出畫牆按譜更誰爭有韻
失評空自說無香莫燒銀燭驚春夢好障丹紗護曉妝
仙種北來初識面臨風拚醉九霞觴

金源諸陵

儲巖

長白山高朔漠連金源風色故依然千秋魂魄猶思沛
萬里丘陵却到燕感事重翻江統疏傷心莫問靖康年

幽蘭一爐雄圖歇汝水悠悠入墓田

杪夏江州急雨

李夢陽

急雨吞江倒石根吐雲匡岳近城門
驚雷不下雙蛟鬪孤電能開九疊昏
白晝黃濤翻庾閣蒼厓翠木溜陶村
乘時說有扶搖力六月東南見化鯤

追舊寄徐子

李夢陽

憶昔逢君雪滿途遙憐為客向江湖
看碑定憶羊開府作賦先收楚大夫
日黑魚龍壓夢澤草青麋鹿上姑蘇

空回玉軫思流水不得驂騑見過都

潼關

李夢陽

咸東天險設重關閃日旌旗虎豹閒
隘地黃河吞渭水炎天白雪壓秦山
舊京想像千官入餘恨逡巡六國還
滿眼非無棄繻者寄言軍吏莫嗔顏

九日寄何仲默

李夢陽

九日無朋花自開登樓獨酌當登臺
孤城落木天邊下萬里浮雲江上來
但遣青尊常不負從教白髮暗相催

梁南楚北無消息塞鴈風高首重回

和毛監察登明遠樓之作

李夢陽

院鎖簾垂白日幽為誰乘興獨登樓地平嵩岳牕中出
天倒黃河檻外流坐對爐煙雲並起醉搖霜筆樹還秋
可憐大厦須梁棟未展那知匠氏憂

送毛監察還朝二首是時皇帝狩於河陽

李夢陽

楚生臨水送將歸黎子當筵賦式微天下汝為真御史
百年吾是舊漁磯沙寒白日蓬科轉風送黃河水葉稀

此去有書應歷上太平天子本垂衣

其二

青天萬仞削芙蓉憶踏匡廬第一峯
哀壑暮雲埋虎豹大江春浪變魚龍
天池御筆親留碣石室山僧獨扣鐘
綵翰昔曾霄漢上舊題應破紫苔封

閩曹二子發京和姪木同舟篇

李夢陽

共水同舟伴謫居海天春色靜涵虛
蠻方故啓流官路漢史終收痛哭書
蜀徼山高常戴雪滇門池苦亦生魚

上林花樹年年在
前席行看入禁廬

熊監察至自西河有贈

李夢陽

當年五郡乘軺過
此日千城攬轡遊
封事幾騰天北極
籌邊直歷海西頭
崑崙壯壓邊塵斷
弱水清翻漢月流
若使巡行皆汝輩
遠夷那繫廟堂憂

臺寺夏日

李夢陽

古臺高並鬱岩崑
斷塔稜層鎖寂寥
積雪洞門常慘慘
炎天松柏轉蕭蕭
雲雷畫壁丹青壯
神鬼虛堂世代遙

惆悵宋宮偏泯滅二靈哀怨不堪招

靈武臺

李夢陽

環縣城邊靈武臺肅宗曾此辟蒿萊二儀高下皇興建
三極西南玉璽來長白山人經國計朔方孤將出羣才
可憐一代風雲際不勸君王駕鶴迴

寄懷邊廷實

何景明

汝從元歲侍今皇誰念先朝老奉常一出雲霄空悵望
十年岐路各蒼茫春天縹緲金莖露晝日氤氳紫殿香

獨有揚雄尚陪從白頭抽筆賦長楊

西海子

何景明

寺下煙波春不開苑中風浪隱樓臺
泉源細繞西山出雲氣深從北極來
萬里乘槎觀日月十年登閣望蓬萊
黃塵碧水須臾事莫使魚龍夜夜哀

送張侍御巡畿內

何景明

漢京樓殿薊門東淮海文章御史驄
三輔自來多寇盜五陵今日更豪雄
埋輪亦在都亭下攬轡仍行甸服中

潯水太行煙霧裏獨看高隼擊霜空

送賈學士往南都 何景明

金陵樓閣九天開銀漢仙槎萬里來宮月夜懸鳩鵲觀
江流春轉鳳凰臺直從北極看南極却望中台接上台
鳴世早傳吳下作逢時更羨洛陽才

送施聘之 何景明

海甸春風攬轡情燕關驄馬去還鳴繡衣霄漢花間出
錦纜江湖樹裏行近日西臺多諫草少年南國有詩名

別絃更憶風流調
愁聽東城二月鶯

送杭憲副兵備天津

何景明

天津橋北望京樓
金鼓東行節使舟
日月書懸滄海樹
龍蛇春壓九河流
百年貢篚通南極
萬里旌旄屬上游
莫笑談兵向尊俎
書生元不為封侯

送王德輝西巡

何景明

中朝御史重西巡
獨下青霄斧鉞新
隴雪洮雲行塞日
胡琴羌笛奏邊春
蒲桃不博涼州地
天馬還隨漢使臣

白筆萬人看氣象肯令河外有煙塵

寄杭東卿商曾二憲使何景明

舊遊俱是吳中俊相憶遙為月下吟他日雲霄須比翼
此時金石更同心樓船水戰江流急鼓角秋城海日陰
寇賊兩鄉今阻絕各天風雨一沾襟

送馬公順何景明

兩年懷抱值君開聞說京華首重回天上故人難再見
世間岐路轉堪哀孤舟落日三江口遠客浮雲萬里臺

南斗尺書相望切暮天鴻鴈幾時來

感興懷獻吉

徐禎卿

客舍秋風動客哀殘花秋日伴殘杯
虛名愧我為身累白眼如君豈吏才
落魄京華空老大旅魂江漢好歸來
山川矯首浮雲迥倚杖遙登何處臺

東獻吉

邊貢

天涯卧病盡高秋河上逢人感舊遊
歲月浮生雙鳥翼風塵遠道一狐裘
君還豈為鱸魚膾我出真同雪夜舟

梅蕊柳條俱動色幾時攜手並登樓

送丁考功東憲之關中

邊貢

鶯花如錦豸袍新建節西行及好春周禮職方分二陝
漢都形勝說三秦天浮紫氣函關動雨洗青蓮華岳真
藻思還應有神助詩成先寄故園人

武昌留別諸使君

邊貢

舟子招招催渡開多情臨別更徘徊虛煩竹馬城邊候
實泛星槎海上迴南郡秋風悲鼓角武昌明月見樓臺

懷人莫厭書頻寄江口雲帆日往來

聖旦南太常作

邊貢

冶城風雨送蕭森萬國呼嵩五夜心帝座永懷天共遠
主恩真挹海同深容臺禮樂還南北建業江山自古今
龍輦鳳旂回首地似聞韶濩奏餘音

遊龍洞山

邊貢

洞門黃葉鎖秋深上客來遊帳古今恍惚謾傳龍跡在
虛明真似佛光臨蒼空日月流元化白晝雲雷起大陰

昏黑下山蘿徑遠殿鐘龕磬裊餘音

登嶽邊貢

玉皇祠畔一憑欄絕頂風高夏亦寒
北去塵沙通瀚海西來天地是長安
青雲迥隔三千界白日平臨十八盤
似有飛仙度幽壑鳳笙聲裊珮珊珊

辛巳書事二首

邊貢

居庸碣石控胡門玉几由來北極尊
閣道逶迤經海岱天河隱見出崑崙
斗間遙識三階列日下從知九軌存

金史卷二十八
真鼎卜郊非浪事萬年珪鬯保文孫

其二

漢水東流夢澤開雲蒸龍氣劃爭迴襄城七聖翔空下
少室三花拂駕來河伯授圖森地軸上公登冊自中台
千秋萬歲應思沛悵慕歌風擬築臺

幕府山

喬宇

說着看山興欲飛湖西雙逕踏霏微寧辭九日登高會
況是諸軍奏凱歸林外鐘聲開宿靄江頭帆影送斜暉

亦知歡會何終極霜露休教上客衣

秋風亭下泛舟

喬宇

荒亭寥落野煙空漢武雄才想像中
簫鼓應聲開畫鷁
帆檣飛影動晴虹
山分秦晉羣峯斷
水入汾河兩派通
少壯幾時還老大
不須回首歎秋風

萬壽日成禮奉天門

鄭善夫

初日鴉啼宮樹林
奉天高殿入蕭森
衣冠況值千秋節
犬馬真懸萬國心
白羽書來兵未解
黃河水落歲將陰

龍旂鳳輦關山道邊事艱難風雪深

王峻甫萬頃波樓

周用

何年百二開神州雙眼適來登此樓
江湖到處是吾土裘馬平生非貴遊
天垂欄檻星斗夜木落洞庭鴻鴈秋
鴈門太守費指點曾見黃河東北流

扈駕郊壇陪祭二首

胡侍

朱壇晴雪媚春空雲從天行氣象雄
八駿宛迴黃竹路六龍遙向玉華宮
爐煙半拂仙人掌樹色微翻少女風

應有海神來候駕南端飛霧碧冥濛

其二

郊壇春蹕遠朱城上帝高居敞玉清
五色幡幢空裏見六軍組練月中明
雲依黼帳成龍采樂上瑤臺作鳳鳴
望秩屢叨陪海嶽涓埃何以答恩榮

九日同諸君子集鴈塔

張治道

重陽何處可攀躋十里峰臺四望低
黃菊驚秋聊暫把新詩發興亦堪題
莫因白髮妨高會且喜清尊共遠携

落帽不須追往事風流真與古人齊

樓夜 許宗魯

樓上寒宵獨坐深漸看明月轉東林
遠天聽鴈搖邊思十夜鳴鷄感壯心
風裏關山飄玉笛壁間塵土暗龍鐔
興才自分甘休棄敢向清時歎陸沈

渡河 馬汝驥

大河懸東翠崖中沙海煙天九曲通
急浪秋翻千樹雨女流曉挂一帆風
胡秦北圻龜鼉窟箕尾西盤日月宮

款乃紛紛輕放舸不知估客定漁翁

寺前秋泛

曹嘉

湖上晴遊即鏡中輕煙淡靄靜浮空
岸迴舟自蒹葭入塔迴雲從殿閣通
驚吹魚龍時出沒傍筵鷗鷺晚西東
鳴橈更泛桃花水不辨秋林返照紅

宴集楚藩樓上作

王廷陳

藩府張筵臨水上危樓改席向天中
牕含江漢澄流遠檻俯衡巫遠勢通
鳴珮忽霑神女雨披襟時拂大王風

梁園勝事今非異
楚國文儒古亦同

寄許州七弟璵
顧璘


千官扈從羨能文
謫牧新聲天下聞
落魄吾家蘇季子
風流南郡小馮君
魚龍路怯黃河險
鴻鴈聲愁碧海分
莫上吹臺瞻越嶠
五湖回首隔重雲

樂清道中

王健

雨晴驛路淨埃氛
鳥弄漁歌到處聞
山迴樹陰牽落照
江空帆影亂行雲
天闕四面樓臺出
地脈千重洞壑分

賸愛巖亭堪把釣
洗心翻愧白鷗羣



古今詩刪卷二十八

欽定四庫全書

集部

古今詩刪卷

二十九至
三十一

詳校官中書_臣李采

侍讀_臣孫球覆勘

總校官庶吉士_臣倉聖脉

校對官待詔_臣胡士震

謄錄監生_臣莫與儔

欽定四庫全書

古今詩刪卷二十九

明 李攀龍 編

明七言律詩

太華山歌 楊慎

太乙終南培塿開
洪河清渭繞行杯
日華先照蓮花上
雲氣常從仙掌來
高穿箭括通天路
俯瞰明星玉女臺
泠泠風馭不可駐
降望大壑心悠哉

李君偕過臯橋新居言別

楊慎

沙門草閣對漁舟坐俯崑池萬里流
蕭索暮途猶浪迹
登臨暇日豈銷憂
阮公失路誰青眼
江令還家尚黑頭
行見羣英滿青瑣
寧忘一老在滄州

上張相公

唐順之

帷中運策九州清
共道留侯在漢京
賜第近連平樂觀
入朝新給羽林兵
儒生東閣承顏色
酋長西羌識姓名
却望上台多氣象
年年常傍紫宸明

元夕詠冰燈 唐順之

初憐火樹鬪春妍，忽見清輝逼夜闌。
出海鮫珠猶帶水，滿堂羅袖欲生寒。
燭花不礙空中影，暈氣疑從月裏看。
為語東風暫相惜，來宵猶得盡餘歡。

胡逸人劉使君夜訪 陳明

竹屋茆堂曲巷幽，何堪仙馭下丹丘。
無人再識桃源路，有客同登雪夜舟。
明月隨君還自去，清樽為我更相留。
蕭條湖上看秋色，十載高吟共白頭。

登海曙樓

朱衡

高樓百尺揀空青檻外諸峰列畫屏
漢署星辰移北極海天風日壯南溟
譯人歲至諳夷語戰舸秋深驗水經
却倚危欄時極目炎荒銅柱接冥冥

九日龍岡奉同王大夫僚長

靳學顏

荒臺九日倍淒涼駟馬雙旌度石梁
望嶽鐘聲初應節洞庭木葉盡飛霜
予家魯水空凝望君指秦川是故鄉
倚閣斜陽正愁絕不知黃菊為誰黃

草橋即席寄以騰新學願

舊國春深草似煙年年此際對離筵
纔聞柳外歌三疊已識尊前路五千
劍閣啼猿梅雨夜錦江駐馬麥秋天
從今莫問西來鴈縱有風翰不到川

原州鎮西樓劉公讌集

王維禎

危樓真倚白雲間霧堞陰陰合萬山
地險胡塵空絕漠天遙漢壘接重關
樽前劍罷鏡筵起塞上年來虎豹門
壯觀平生今更幾坐高明月不知還

送柯公移鎮河南

王維禎

年來烽火徹秦關，募士徵兵不暫閒。
地重祇須馮異守，節移難借寇恂還。
旌旗龍避三河水，斧鉞花迎二室山。
梁國舊傳多俠客，知君定訪夷門間。

奉和汝承上清宮

許應元

清溪樹外羽人宮，員嶠方壺在域中。
丹竈雲標遺漢劫，石橋海上與秦通。
松間舊聽郎官履，花下應迷使者驄。
為有相如大人賦，飄飄此意欲陵風。

贈王督學

侯一元

長江千里白波來
畫舸風輕五兩催
新雨曉看雷澤漲
冰壺秋映洞庭開
洲前落月聞湘瑟
峽外飛雲見楚臺
辭賦郢中應一變
漢家方重馬卿才

登城閱士

俞憲

旌旗四面接遼城
霜落高秋紫塞清
五路雲霞連海氣
千家砧杵奪邊聲
射鵰不數呼韓部
奪馬今知嫖騎名
東望扶桑一長嘯
臨風真有挂弓情

清明揚州道中憶王端公

朱曰藩

江花江草淨春煙北望空懷乘興船
水國人家種楊柳清明士女競鞦韆
客厨未乞龍蛇火旅食偏催犬馬年
遙想風流王柱史西臺銀燭柘枝顛

送少司成朱子之金陵

余文獻

鍾阜龍盤赤帝庭更從北斗借文星
燕臺仙侶憐雙管白下諸生有陸經
璧水細通玄武曲講堂朝對孝陵青
請看梧栢參天處翠輦當年竟日停

九日携具要銘將軍迷閣登高有懷

劉景韶

蓬萊閣上劍譌豪縱酒聊舒百戰勞
漠北金河歸鴈斷塞南銅柱拂雲高
尊前霜菊浮隋苑亂後秋砧雜海濤
却笑牛山空墮淚風塵天地屬吾曹

漫興

劉爾牧

意氣橫生醉後歌少年猶自說三河
風塵極目須長劍雲水關心寄短蓑
霄漢只今饒雨露窮途仍是戀陽和
春來莫笑柴門僻庭樹開花滿舊柯

送龔侍御之南都

謝榛

萬里天風吹鐵冠，三吳秋水正漫漫。
匣中星動劍光白，帆外霜飛江色寒。
鴻鴈早傳瓜步信，芙蓉還傍石城看。
南都賦就應相憶，明月孤樽坐夜闌。

送顧天臣還吳

謝榛

樽前潦倒送飛鴻，別賦兼秋轉自工。
白壁在懷驚氣色，黃金隨意見英雄。
天低鄴下長楸樹，霜落淮南老桂叢。
此去阿蒙人借問，風流非復舊時同。

送李別駕宗罷

謝榛

一樽聊醉濁河濱，老去相知更幾人。
趙瑟離聲逢雨雪，郢歌高興得陽春。
自憐索駿堪酬主，不是連城豈致身。
北上即今天咫尺，佩刀寧復久風塵。

閒居張伊嗣見過

謝榛

鄴都形勝帶衡漳，風土相依即故鄉。
閒到白頭真是拙，醉逢青眼不知狂。
城雲無色日將暮，籬菊多花天有霜。
世事憑君休浪語，此中高卧意何長。

秋日寄皇甫水部兼呈子循別駕

謝榛

聞君遂自楚天來，一別梁園見賦才。
搖落舊曾悲屈宋，寂寥今復弔鄒枚。
黃河蕩日寒聲轉，嵩少連空遠色開。
何事弟兄俱謫宦，西風愁對菊花杯。

寄懷陸汝成

謝榛

花前樽酒度清宵，夢到春江萬里橋。
明月下連秦塞迥，白雲秋盡蜀天遙。
自憐詞賦成多病，君有聲名起聖朝。
應對青山弔揚馬，騷魂千載復誰招。

奉懷于鱗謝榛

十載交游滿薊門浮雲回首幾人存
古來意氣誰當合老去文章爾共論
北極寒星搖短劍西山暮雪照青樽
於今尚醉平原館何日能酬國士恩

寄張幼于吳山讀書

黃姬水

十載東林塵外蹤漁歌樵唱上方鐘
詩成盡染煙霞色性定應同土木容
破戒常持社中酒捐囊曾買路傍松
重谿迴壑猶嫌近更上吳山第一峯

崔駙馬山池

吳擴

平陽池館接青霄，閨苑瀛洲路不遙。
帝女巧將霞製錦，仙人長以鵲為橋。
樓前疊石雲生座，洞裏探梅雪滿條。
詞客慣來陪賞洽，月明酣聽鳳凰簫。

奉訪于鱗郡齋

黎民表

揖客龍門意未輕，北來風雨暗孤城。
青山不斷襜帷色，濁酒深知傲吏情。
豈謂漢庭疎汲黯，翻令渤海重王生。
漫從華髮悲留滯，岳牧於今有大名。

靈巖寺

許邦才

澗壑縈迴繞梵宮諸天色相坐來同巖崖陰積千年雪
鈴鐸宵聞十里風寺抱五雲金界麗塔銜孤月玉毫空
石僧東嶺緣何事似指蓮花問朗公

除夕

許邦才

萬山深處石城闌解宇荒涼積網塵鳥雀不疑隨坐起
煙嵐常為染衣巾恩懸北極天邊日家在東陵海上春
乍客異鄉兼歲暮倍添華髮鏡中新

于鱗宅送江山人 許邦才

良夜琴尊興不孤
蕭然行色惜山湖
天涯芳草思公子
雪夜春風戀酒徒
那惜十千供舉白
從來百萬判呼盧
河橋楊柳誰堪把
況復梅花正滿途

白雪樓二首 許邦才

新題銀榜象蓬萊
浮動高寒見楚才
宋玉至今無和客
馬卿元自有琴臺
洞庭黃鶴凌秋度
荆表清漳繞檻來
得似詞豪開絕唱
岱雲春樹日徘徊

其二

郢人高唱海西臺氣味同稱絕代才客自貌姑山裏到
春從巴蜀水中來時看玉樹三秋色遙接金莖片月開
顧我梁園慙授簡憑闌忽憶此銜杯

賜見東宮於臨保室賜酒饌謝恩

殷士儋

詔許東朝謁帝儲瑞雲縹緲護齋居重輝快覩前星彩
異渥叨承湛露餘卜厯已知同海岳食珍深媿報瓊琚
佇看講幄虛延問日覲龍姿侍直廬

雲岑閣

李先芳

天畔登樓俯翠屏，萬山迴合抱巖扃。
城隣虎瞰風蕭瑟，地擁雲岑晝杳冥。
雨後嵐光搖粉堞，潮來江氣動青萍。
憑高已覺鄉心切，何處秋蟬不可聽。

玉峽山練中丞祠

李先芳

玉峽高臨渝水陰，南臺遺廟未全沈。
亦知六駕飛龍日，自表孤臣扣馬心。
白石粼粼江底見，三峯矗矗雨中深。
百年松檟凋零盡，荒塚殘碑何處尋。

滕王閣

李先芳

高閣嶙峋攬上游，還將歌舞向東流。
憑軒作賦何年事，遠水長天萬古愁。
鳥外片帆生極浦，雨中芳草遍青洲。
江湖滿地無舟楫，天畔何人獨倚樓。

送沈太守之潯州

李先芳

萬里褰帷豈薄遊，鬱林虎竹漢諸侯。
郡隣勾漏三山迥，城壓黔江二水浮。
卧閣倦題青玉案，行春遙繫木蘭舟。
蠻煙瘴海鴻難至，珍重炎方桂樹秋。

送王侍御巡甘肅

李先芳

君王西顧重籌邊
繡斧衝寒出酒泉
絕塞倒懸青海月
長風吹斷玉門煙
羌兒夜奏燉煌樂
宛馬春嘶苜蓿天
何用先聲報韃旦
霜威昨已到秦川

太液池春望

李先芳

金海恩波向曉凝
玻璃千頃碧澄澄
半空夜落明河水
二月春流太液冰
帳殿樓船上坐
御溝楊柳鏡中凭
廣寒更出蓬瀛外
百丈虹橋挂玉繩

送李于鱗入覲 李先芳

使君符竹下邢臺，雙闕崢嶸北望開。
禹貢九州元會日，漢家三輔出雄才。
流澌臘月催寒盡，殘雪春山積翠來。
此去朝正應有賦，天涯綠筆共誰裁。

白燕 李先芳

昭陽宮裏洗新粧，粉黛三千枉斷腸。
不是樓臺涼似水，那教毛羽化為霜。
河邊度影銀生色，花裏銜泥玉作香。
莫向衆中誇素質，蛾眉妬殺雪衣娘。

懷于鱗

王世貞

燕京歲晚競鳴珂
郢雪春來幾和歌
尚有乾坤容汝在
空留日月向人過
雲橫大麓低平野
天拆飛流墮濁河
滿目黃金饒漢吏
千秋屈宋自堪多

奉謁長陵敬志鄙感

王世貞

長陵松柏似龍蟠
象緯高垂列漢官
萬里乾坤留劍舄
百年豐鎬見衣冠
只今南粵虛傳譯
聞道西羌未解鞍
文帝威靈終在眼
秋來霜露不勝寒

病甚懷于鱗

王世貞

蕭條落日罷銜杯
寒入楓林夢乍迴
我已河山甘付骨
汝從天地更論才
途窮萬事輕相讓
意盡千秋莽自哀
藥餌漸扶雙眼在
未煩驚策素車來

送張戶曹出計百粵暫如銅梁

王世貞

薊門擲甲待胡烽
海內軍須不自供
赤羽去隨新使者
黃金歸隸大司農
界標銅柱天垂盡
人度蒼梧瘴幾重
聞道壯遊仍畫錦
春來車馬入臨邛

于鱗至分韻二首

王世貞

把酒千門朔思生
太行高雪照天京
道傍燕石晝俱隕
匣裏并刀風自鳴
遂有羣靈開黯淡
即看五馬頓崢嶸
相違歲月無勞數
屈指人間幾大名

其二

自擬仙舟問李膺
濤聲寒壓九河水
冰愀然嘯日思雄劍
忽爾垂天至大鵬
過客傳書成詛楚
憐予頌酒尚如澠
請看寂寞華陽館
海內何人有代興

贈于鱗

王世貞

醉爾春風金屈卮，忽看山岳坐來移。
停鞭欲盡幽州色，立馬愁聽出塞辭。
我自青雲甘薄宦，誰當白雪問相思。
蒼茫大陸頻回首，日暮乾坤未可期。

寄送于鱗

王世貞

舞劍鳴笳出薊門，傳驂回首視中原。
病餘丘壑吾仍在，別後風塵爾更尊。
豈為衣冠成落魄，向來詞賦失消魂。
何人泣抱陵陽石，車馬紛紛未可論。

于鱗郡齋

王世貞

飛傳霜橫九塞戈，為君風雨又滄茫。
相憐白壁燕山盡，未有黃金漢詔過。
坐客尊醪初北海，郡人經術似西河。
不知清羽頻移調，蕭颯城頭落木多。

于鱗郡閣

王世貞

使君杯酒一登樓，倚檻蕭條落木愁。
不盡天風吹大陸，何來山色滿邢州。
匣中星動雙龍夜，柝裏寒生萬馬秋。
為問郡齋諸記室，幾人能並李膺遊。

春日雜懷二首 王世貞

故人相慰檄書稀
又見徵兵解越圍
敢向東方誇賜履
可因南國賦無衣
家家砧杵鳴春日
處處戈船繫夕暉
聞道封侯須健手
羽林生長自輕肥

其二

閩嶠除書問莫悲
豫章遷客正相思
但令懷璧俱堪罪
何用投珠始見疑
天外風流名士盡
鄴中星散舊游知
祇緣吾在能株累
漁海樵山任所之

答張幼于

王世貞

十年曾識鳳凰毛
回首風煙夢寐勞
書到關河雙玉案
賦成湖海一綈袍
握中明月誰相貴
曲裏青山且自高
聞道漢庭推仲蔚
莫令秋思滿蓬蒿

懷于鱗兼寄子與二首

王世貞

紫氣函關客出迎
誰堪起舞應鷄鳴
千年泰華東西色
萬里江河日夜聲
自是文章生骭髀
豈容吾輩擅崢嶸
猶憐奉使還徐幹
車馬無心老漢京

其二

漢省逶迤十載餘
即看高議主恩虛
何人北海憐精衛
有客東門類爰居
事往交游工變態
時平偶語畏詩書
亦知身外元萍梗
泛泛江湖恣所如

提兵安東海上大閱

王世貞

親提千騎向東方
劍客黃金盡解裝
桃葉初明珠勒馬
梨花半點綠沈槍
拍天濤擁軍聲合
駕海雲扶陣色揚
北闕尚虛南越首
何人先領伏波章

登岱二首

王世貞

軒轅皇帝有高臺鞭石千秋輦道開匹練天縈吳觀出
金泥日射漢封回西盤瓠子河如帶東挂扶桑海一杯
誰為登壇論王氣祇應塵世有仙才

其二

尚憶秦松輦路傍至今風雨鬱蒼蒼千崖忽敞中原日
六月長飛使者霜在昔鈞天青帝座即今封禪白雲鄉
茂陵書就應猶渴自有池頭玉女漿

和于鱗登太華山 王世貞

落日中原太華陰
客携秋色獨登臨
俄添嶽掌蓮峯峻
忽入關門紫氣深
六著仙人邀對博
三漿玉女醉還斟
誰憐此地餘秦觀
西望雙懸萬古心

以吳絲酬于鱗 王世貞

故人三徑新蓬蒿
鴈門太守徒爾勞
斗酒風塵白日薄
械書海岱青天高
念欲報之吳縞帶
何以遺余秦復陶
千秋衣被各無限
世途往往稱綈袍

答于鱗

王世貞

歲晏天高首重迴，中原萬里一書來。
崢嶸未病驚人筆，黯淡長浮避客杯。
鴈後江湖開氣象，燈前風雨失時才。
自憐身隱文烏用，縱有微吟嬾向裁。

再答于鱗

王世貞

客有將歸金錯刀，暮雲寒色動江皋。
故人知未馴龍性，小弟憑誰與鳳毛。
名盡酒狂差自若，病來詩態任兒曹。
相聞不淺埵簫思，莫放陽春調轉高。

白雪樓二首

王世貞

平楚蒼然萬木齊，嵯峨飛閣岱雲低。
峯頭玉蕊春長在，檻外金莖夜不迷。
賦就梁園無左席，書來郢曲有新題。
何人強責元龍禮，不遣青樽吾輩携。

其二

伏枕清秋海岱邊，高樓中壁頰蒼煙。
同雲不盡千家曉，寒月長開萬古妍。
天上幾看新玉樹，山中端合老朱絃。
誇他信美非吾土，句就還應兩地傳。

春日同張幼于輩過黃淳父

王世貞

塵尾玄言日未斜
隱囊匡坐自煎茶
尊前白雪中郎調
屋裏青山處士家
千里驥心降付酒
十年蓬鬢怯看花
浮生幸有江湖在
莫遣風塵負歲華

春日集于鱗宅

王世貞

辛盤栢酒故人携
醉裏無愁白日低
歲序風塵俱自失
吾曹天地豈堪齊
吟揮萬象春誰在
把酒千門夜不迷
詰旦如聞周太史
何來雲物帝城西

送徐子與獻獄江南

楊繼盛

寥落白雲庭半虛有功此去更何如
西曹月滿幽人榻南國星隨使者車
塞鴈不堪行又斷秋風況是葉飛初
秣陵故舊如相問為道疎狂病未除

大風中王元美年兄賜顧言及先寄詩扇未到

楊繼盛

陰陰朔氣滿皇州烈烈悲風暗鳳樓
吹合凍雲低欲暮俄添寒雨更生愁
豈緣結襪知廷尉莫以琴鳴問楚囚

聞說右軍曾遠寄無因珠玉好誰投

古今詩刪卷二十九

欽定四庫全書

古今詩刪卷三十

明 李攀龍 編

明七言律詩

奉答于鱗見贈之作

王世懋

江上秋空度羽翰
故人千里問加餐
齊紈忽破吳門色
郢雪長飛海國寒
句裏青山堪自遠
篋中明月傍誰看
思君獨夜狂歌發
轉向交游把臂難

寄題白雪樓二首 王世懋

青山卜築傍松筠
此日南樓屬興頻
地敞風雲懸自合
天橫海嶽望常新
樽前色借齊宮曉
賦裏聲回梁苑春
莫怪鹿門常謝客
未堪雙眼向巴人

其二

西北高樓天際看
美人清夜自憑闌
悲風忽送雙鴻起
飛霰遙從萬樹殘
綵筆縱橫搖岱色
綈袍蕭瑟上春寒
登高莫作江南望
郢曲于今和正難

大司寇顧公池亭 王世懋

卜築秋高萬壑陰
空山白髮著書深
長松老作虬龍態
古磴閒從薜荔侵
西望吳門紫匹練
東迴若水寫鳴琴
開尊重借儒生色
倒屣誰酬國士心

懷明卿 王世懋

詞客漂零自古今
天涯薄宦且浮沈
三州地敞中原色
二室秋高大陸陰
東帶風塵摧傲骨
寒帷落日佇雄心
河陽幾度看花發
遮莫潘郎鬢已侵

北郊卧病不赴齋宿屬元美諸人並移病因賦

徐中行

仙臺玉漏霑沈沈遙望金莖祇自吟
司馬文園長病肺
漢皇宣室正齋心
高城過雨疑秋早
閒館焚香坐夜深
何事故人俱伏枕
虛傳載筆賦汾陰

射陽湖逢子相北上醉別

徐中行

邂逅長安舊酒徒
張燈夜醉射陽湖
斗間劍氣雙龍合
江上濤聲萬馬趨
病起適逢枚叔賦
狂來重入步兵厨

明朝挂席還南北回首長淮月色孤

喜于鱗至

徐中行

咫尺關門紫氣層滹沱千騎踏寒冰
塞帷雪色迴雙闕
擊筑春星動五陵
肝膽詎從詞賦見
聲名或藉圖書增
亦知元禮龍門迥却怪當年醉裏登

送元美出塞

徐中行

柳色春深五鳳城
明光使者授長纓
風雲六傳從天下
鼓角千山出塞行
豐劍晝推恒岳色
郢歌秋折大河聲

何人為掃燕然石萬古寧留爾輩名

送于鱗還郡

徐中行

計吏雄才寵漢官還驚五馬出長安
壚頭春入燕山色
七首風生易水寒
三輔黃金明主問
千秋白雪世人看
太行不厭高齋客
橫笛休吹行路難

李伯承諸子見過

徐中行

病客都門卧寂寥
羣公何意問綈袍
風塵賴汝開雙眼
湖海憐余改二毛
落日五陵寒擊筑
浮雲萬里過持螯

酒闌共指談天處北斗遙連碣石高

元日簡黎惟敬

徐中行

天涯回首跡俱陳雲物長安歲自新
託興梁園唯我在倚歌燕市更誰親
風塵一病生華髮劍珮連朝隔紫宸
吾黨漂零君自見相逢寧惜賦陽春

表臺同諸僚友燕集

徐中行

表臺高出瀕儒林參佐乘春此盍簪
自得范滂唯畫諾不妨羊祜數登臨
嵩山近接真人氣汝水深知傲吏心

倒著接羅從客笑使君今已二毛侵

寄題李于鱗白雪樓二首

徐中行

寥廓誰論碣石宮千秋作者此樓中
自非海岳開天造安得文章有國工
撫軫陽春迴黯淡揮毫寒色散鴻濛
杜門莫怪常高卧郢調人間未易同

其二

駘蕩深知宋玉才層樓高倚岱宗開
月含雙掌雲邊出濤擁三山海上來
梁苑賦成誰授簡郢中歌罷自銜杯

側身東望飛揚甚乘興馬能信宿迴

汝寧表臺作

徐中行

蒼然一望盡中原天柱高標逼斗垣清夜衆星臨汝潁
黃河分派出崑崙風前獨立南陽嘯花下頻開北海尊
授簡使君文雅地何如枚叔賦梁園

寄答廣陵歐文學

歐南海人 徐中行

蕪城客夢滿江華千里懷人尺素勞篋裏夜光南海月
賦中秋色廣陵濤談天寧復如燕市玩世何妨似馬曹

念爾最憐中散調知音寥落好誰操

戚希仲楊伯章二禮部携酒夜過同于鱗賦

徐

中行

三謁承明且未迴十年詩社此新開携樽黃菊重陽後
並馬青雲二妙來潦倒繆曾題漢柱文章終自起燕臺
省郎星聚元非客太史明朝莫漫猜

于鱗上計且至病中志喜

吳國倫

聞君五馬度滹沱相望檐帷雨雪過獻璧親承天子問

賜金誰似大夫多書來一判呼盧醉病起猶堪擊劍歌
此地重逢關象緯不知寒色掩鳴珂

鄱陽湖

吳國倫

欲向匡廬卧白雲宮亭水色晝氤氲千山日射蛟龍窟
萬里霜寒鴈鶩羣浪擁帆樯天際亂星臨吳楚鏡中分
東南歲晚仍輦鼓莫遣孤舟逐客聞

屠使君高齋

吳國倫

廬州郡閣與雲齊卧閣停雲白日低峯擁耆閣浮海上

金少川集卷三十一
地臨金斗壯淮西相看春色杯應滿況是風塵手共携
莫問年來遷客路乾坤處處使人迷

寄子鱗

吳國倫

萬里悲風吹暮笳
逐臣猶自傍京華
裁書欲寄孤生杜
謝病曾營五色瓜
馬上山明青海月
夢中春老赤城霞
可憐舊社諸兄弟
只似河橋楊柳花

元日同諸守臣從孫侍御行朝正禮於郡中

吳

國倫

濯錦池頭曙色催孤臣春夢五雲回仙班彷彿旌門入
淑氣氤氳帳殿開日近中峯呼萬壽天依北斗望三台
誰從野外嘲綿蕞御史今簪白筆來

德州徐憲使汝思招飲

吳國倫

岐路巾車避客過平原春色柰君何論文豈敢咻齊傅
對酒聊能縱楚歌風起鴈聲寒赤塞沙蒸日氣暝黃河
不辭永夜呼盧醉此會乾坤總未多

同張肖甫遲徐汝寧於大梁

吳國倫

上國傳書已暮春
檐帷幾日度河津
重逢漢吏分符處
合是梁園投簡人
詩句小能酬造化
酒杯深自解風塵
中嵩雲氣平臺月
便欲持之贈所親

明卿席上賦

宗臣

白馬黃金事冶遊
薊門春色總堪留
一尊破爾青山夢
萬里懷人落日愁
鸚鵡舊悲湘客賦
鸛鷀初典漢臣裘
酒闌忽聽孤笳起
腸斷朝雲出塞秋

同元美集明卿宅

宗臣

清秋此日滿長安那肯過逢不夜闌風雨忽隨雙騎到
薜蘿相對一樽寒愁心獨有中原在俠氣君從北斗看
戎馬關山餘涕淚十年空負漢臣冠

集子與宅

宗臣

匕首如霜照客顏相逢俠客滿燕關荆軻西去此其輩
易水東流不復還天地只今搖赤羽江湖何處問青山
悲歌忽憶金門隱與爾逍遙供奉班

登觀音山

宗臣

一上孤峯眺大荒
吳山楚水共蒼茫
雲間棟宇垂天渚
江上鼉鼉吹石梁
絕壁畫開風雨色
斷崖秋挂薜蘿長
吾將從此尋瑤草
黃鶴翩翩歸帝鄉

登景山落霞亭

宗臣

搖落青楓比上臺
石門雙磴倚崔嵬
河流南注崑崙坼
龍氣西看芒碭推
十月衣裳寒杵急
孤城睥睨暮笳哀
故山麋鹿還誰主
楚水淮雲首重回

燕臺感秋

梁有譽

薊北風煙驚壯心感時偏覺二毛侵功名空羨虞卿璧
世事徒高季子金戰後關山生暝色雨餘城郭澹秋陰
即看節候堪杯酒徙倚聊為越客吟

燕京感懷

梁有譽

鹿塞戈鋌血未乾龍庭烽火報長安擬擒可汗先開幕
欲拜嫖姚更築壇青海月明胡馬動黃榆風急皂鵬寒
材官羽騎多如雨夜夜旄頭倚劍看

送莫祠部督學貴陽

梁有譽

獻歲星輶出漢京
南中鳥道入雲平
遙經遷史浮湘處
肯讓文翁化蜀名
戀闕夢懸春署月
登高詩滿夜郎城
莫嗟萬里風煙迥
攬轡應憐報主情

送羅山甫還潤州

梁有譽

羅含長嘯出燕都
負笈空藏五嶽圖
搔首風塵悲燕雀
浪遊詩卷滿江湖
人憐玉樹秋雲遠
家對金陵海月孤
為問戴顒樓隱處
煙霞還似昔年無

送陳山人自真州還越中

梁有譽

客子將歸夢若耶煙波深處隱淪家相逢一滯淮南桂
別後應迷洞口花瀑布晴搖青嶂雨飛梁朝映赤城霞
越中山水多佳麗莫嘆漁樵老歲華

中秋集張子畏宅

高岱

風吹明月散千家漢闕金莖綴露華砧杵秋聲連鴈塞
關山夜色滿龍沙元規興劇南樓宴博望名懸北斗槎
白髮高堂今夕夢應憐遊子滯天涯

送張駕部憲使赴四川

高岱

高城鼓角動秋聲萬里憐君擁傳行巫峽雲煙詞客興
巴山風雪故人情壯心豈謂燕臺迥清世還看蜀道平
魚復陣圖遺蹟在相逢他日聽論兵

汪正叔席上對菊別子畏

高岱

清霄虛館絕紛華霜滿高城咽暮笳尊酒放歌俱白雪
風塵愁鬢又黃花幽懷共擬淵明宅遠道堪憐博望槎
此去逢春多塞鴈莫言巫峽是天涯

秋夜送梁舍人奉使便道歸嶺南

高岱

沈沈宮漏夜霏微
風灑離愁動客衣
仙掌乍分秋色去
征帆遙帶月明歸
路經庾嶺梅花發
天入衡陽鴈影稀
尊酒薊門須盡醉
明朝空惜故人違

冬日戴金吾園亭

高岱

朔風吹雪晝冥冥
車馬聊因訪戴亭
尊酒喜逢談劍地
圖書疑是草玄亭
髯從久客愁邊白
竹向幽人句裏青
却憶江南空別業
移文今愧北山靈

送徐荊州

高岱

中原形勝古荊州
露冕看君此壯遊
十載共淹長樂漏
一麾今賦仲宣樓
雲開夢澤浮空盡
天倒巴江入楚流
應念故人頭盡白
風塵獨自滯貂裘

羅戶部使黔蜀

高岱

長鋏清尊賦遠征
燕臺冰雪不勝情
關山萬里勞輸輓
天地頻年苦甲兵
飛蓋曉星凌劍閣
孤槎秋水泛昆明
當時王馬風流藉
復爾雲霄重此行

陳憲卿兵備井陘

高岱

大漠雲生接太行鳴蟬芳草動離觴十年帷幄籌邊苦
此日旌旗出塞長天作重關嚴虎豹人從三輔避風霜
高秋泚水寒煙盡為訪淮陰舊戰場

萬章甫兵憲滇中

魏裳

仙郎擁傳出燕關開府西南控百蠻萬里煙濤青雀舫
千秋詞賦碧鷄山主恩題柱雲霄上時難論兵天地間
春到昆明懷漢苑幾回鳴玉共朝班

送高伯宗還楚

魏裳

文園多病轉相親
搖落秋風白髮新
寂寞潘輿傷往賦
淒涼郢調倦游人
雨聲萬壑懸江樹
暝色孤帆落漢濱
此去烽煙開北極
側身天地更沾巾

懷子與

魏裳

頻年烽火近長安
關塞蕭條行路難
亂後客心愁裏折
別來書札夢中看
玄經草罷時名左
白石歌成夜色寒
明月五湖堪欲滿
懷人千里正凭闌

送孫大宗伯之金陵

魏裳

仙掌高寒曙色開
尚書曳履下蓬萊
望懸北斗時名重
地入金陵王氣迴
獻納久傳三殿疏
風流真羨兩都才
已知門下侯芭遠
問字何人載酒來

夏夜于鱗山樓

魏裳

濁酒高樓暑自清
凌雲詞筆意崢嶸
星辰倒挂青萍色
山水涼生綠綺聲
賦入甘泉通御氣
人傳河朔見交情
知君庾亮多幽興
長嘯胡牀坐月明

春夜與于鱗宿龍洞山同賦

魏裳

握手千山意獨親
飛揚不似在風塵
彩毫自照驪珠色
綠酒還傾郢雪春
芝草舊傳安漢客
桃花猶識避秦人
途窮且莫悲車轍
一醉能令萬象新

白雪樓

魏裳

郢調淒涼思轉幽
卜居還倚鮑山丘
乍疑海氣能為屋
不道仙人獨有樓
乘興好看明月上
登高長嘯白雲秋
琴心自在誰堪識
且聽巴人下里謳

天目先生青蘿館集得湖字

汪時元

屋裏煙霞逼畫圖山中歲序過
靡蕪開樽暮雨來三徑
染翰春雲出五湖白髮有誰工
說劍黃金且自判呼盧
相逢意氣仍相許總是高陽舊酒徒

滄溟先生起家觀察浙江

汪時元

泰岳清風梁甫吟函關真氣復南臨
千秋禹穴探書興
一日龍門御李心湖海向甘雲卧穩
乾坤難負主恩深
若教司馬文園老誰為誇胡賦上林

鸚鵡洲弔禰衡

洲今沈江矣 汪時元

黃鵠磯頭日夜聲似猶鸚鵡賦初成於今明月懸江漢
何處芳洲問禰衡古木一川秋色盡寒濤千載暮煙生
臨觴忽有悲風起激楚陽阿氣未平

登黃州赤壁

此即蘇子瞻行樂處而猶有破曹赤壁在嘉魚馬

汪時元

峻嶒赤壁倚煙霄伯氣冥冥入望遙兩賦山川名後世
三分天地見前朝橫江浪湧如相待縱酒風流可再招
徙倚不堪搖落後武昌南去更蕭條

遊石湖蘭若

釋來復

荷花蕩西湖水深上有蘭若當高岑客吟時見猿鳥下
僧定不聞鐘磬音雨香秋林橘子熟雲落空澗棠梨陰
閒來掃石坐竹裏靜與山人論素心

古今詩刪卷三十